



Jumat, 13 Desember 2024

Ogen : Lukas 7:38, 44



Isapuina Alu Bukna



“*Rambut adalah mahkota perempuan.*” Selogan enda nuriken kerna ngaruh buk ku bas kegeluhen diberu. Icuci, ipangkas, i tama vitaminna ras sidebanna. Arah buk si mejile mereken kinijilen ku bas penampilen sekalak diberu.

Turi-turin sekalak diberu si perdosa, meg i kerehen Jesus ku rumah Parisi, e maka minter idahina janahna tangis mbersihkan nahe Jesus alu iluh dengen ielapna pake bukna. Tupung si e buk e jadi lambang pengabdin man Dibata, e maka ipegedang me. Piga-piga kesaksin pustaka nuriken kerna pentingna buk: buk si gedang e jadi kinijilen (perhiasan) dilaki ras diberu (Hakim-hakim 16:13,19; 2 Samuel 14:26). Imam bukna la banci takal tabu/botak (Esekiel 44:20), ipekena-kena alu mehuli (2 Raja 9:30, Enden Salomo 4:1). Dibata pe igambarkan erbuk mentar (Dan 7:9). Minaki takal temua e nuduhkan *keramahan* (Luk 7:46). Teridah maka buk enda bagi si iperdiateken i bas kegeluhen paksa si e.

Sekalak diberu perdosa reh ku Jesus alu ngelapi nahe Jesus alu bukna, nuriken maka takal (buk) si ianggap kinihagan, pengabdin man Dibata ras siipekena-kena sedekah enda itamakan ku nahe Jesus. Iendeskenna me si mehergana kal man Jesus. Lit i je kinteruken ukur dengen pengakun aminna pe la ibelaskenna maka ia meteruk, Jesus e simeganjangna. Itandaina bana maka ia tuhu-tuhu meluat. Nahe Jesus si meteruk e ganjangan asangkan dirina.

Bas kegeluhenta pe biak enda perlu tetap ipebelin. Kai si mehagana, simeganjangna, simejilena bas kita e lah iendesken ku Jesus, sebak pusuh si bage nge iidah ras ialoken Jesus.